

# NORDSÜDOSTWEST

musik: berni weber / bernhard  
text: padi bernhard  
© 2010 all rights reserved

du gisch s'kommando, schtüürsch das boot, dur jede schturm i gröschter not  
du weisch genau, wo's meischtens duregahd, du seisch, wer wie was wenn afahd  
du machsch mi a & löschisch s'liecht, ich weiss nid was i ohni dich miech  
d'nacht chund erscht wens du seisch & s'git nüd wo du nid weisch

**du bisch de räge zmitzt im summer, du bisch so früsch wie erschte schnee  
du bisch de morge- & de abigschtärn, du bisch nord süd oscht & wescht  
du bisch de herbschtwind wo d'blätter furtrisst, bevor de himml brännt  
& de früehlig gschpüri nume wäge dier**

du bisch de fahrplan machsch mi tag, hesch en antwort uf jedi frag  
du gisch mer luft, raubsch mier de schnuuf, & jedi tür machi für di uf  
du seisch wer chund du seisch was gad, du bisch hellwach, du bisch parat  
du bisch vo allne hie di bescht, du gisch gärn all's & mier de rescht

& chani einisch nid bi dier si, de fühl mi einsam & elei  
du bisch mis universum, mini wält & mis dehei  
& weni alles müessti häregä, nur dass i chönnti bi dier si  
denn isch's mer glich, so glich, du bisch so viel meh für mich

**du bisch de räge zmitzt im summer, du bisch so früsch wie erschte schnee  
du bisch de morge- & de abigschtärn, du bisch nord süd oscht & wescht  
du bisch de herbschtwind wo d'blätter furtrisst, bevor de himml brännt  
& de früehlig gschpüri nume wäge dier – gimmer de rescht...**

# WIEDER DA

musik: markus kessler / bernhard  
text: padi bernhard  
© 2010 all rights reserved

ich weiss no gnau, wo du hesch gseit, mit üs sig's glaub verbii  
wenn s'eintä s'ander nid vertreit, söll mä's nümmä so la si  
& ich weiss immer no nid wenn, dass ich dich eifach ha la gah  
doch ich weiss nid erscht sit denn, was ich verlorä ha

**& jetzt schtahni wieder da, mier hend us lang scho nümmä xeh  
chumm, mier fünd nomal vo vorä a, vergässed was isch gscheh**

& denn hani mi la triibä, bis i gwüsst ha, was i will  
& sie hed gseit, ich sölli bliibä, äs gäb hiä no so vill  
doch äs isch nid eso cho, ich chumä plötzli nümmä druus  
schtatt de friedä irgendwo, hani jetzt de tüüfel im huus

**& jetzt bini wieder da, ich ha di lang scho nümmä xeh  
chumm, mier fünd nomal vo vorä a vergässed was isch gscheh**

glaub mer, s'isch so nid plant gsi,  
hätt wüerklich gärn no wiitergmacht  
doch dass es plötzli eifach eso ufhört,  
das hätti vor jahrä no nid dänkt  
guet, amix chunnt's halt gliich,  
chli andersch als me meint  
ha gmeint, ich sigi äntlich riich,  
ha irgendöppis irgendwiä verdreih

**& jetzt schtahni wieder da mier hend us lang scho numme xeh  
chumm, mier fünd nomal vo vorä a vergässed was isch gscheh**

# S'MUESS ESO SI

musik: berni weber / bernhard  
text: padi bernhard  
© 2010 all rights reserved

immer gnau denn, wenn d'meinsch, es laufi grad so guet nach plan  
de chunnt de hammer, lauft usem rueder oder äs haut di us de bahn

immer genau denn, wenn glaubsch, dä scheiss ziech jetzt einisch a der verbii  
stecksch villicht übermorn scho bis under bede arme drin  
& du fragsch dich wieso das so isch

**säg, hesch es no nid kapiert, dass nid nur dier das passiert – s'gahd wieder verbi  
& falls es dich interessiert, das ha nid ich arrangiert – s'muess eso si**

immer gnau denn, wenn d'muesch, denn gah'ts nid & du verschtah's nid  
& wenn dich ändlich denn a öppis gwöhnt hesch, cha's morn scho andersch si

immer gnau das, wott d'wetsch, ja, das chasch nid ha, das isch für andri da  
& wenn du vill gäld gwunnä hesch, wett plötzlich jede öppis vo dem ha  
& du fragsch dich wieso das so isch

**säg, hesch es no nid kapiert, dass nid nur dier das passiert – s'gahd wieder verbi  
& falls es dich interessiert, das ha nid ich arrangiert – s'muess eso si**

wenn's nid vorwärts gahd, nid ganz rund lauft,  
du uf em schluch schtahsch, wie dä esel vor em bärg  
& nimm wiiter weisch, no kei lösing hesch  
laufsch wieder komplett näb em wäg  
& du fragsch dich wieso das immer nur dier passiert

# MÄNGISCH

musik: berni weber / bernhard  
text: padi bernhard  
© 2010 all rights reserved

mängisch passiert's mer eifach, dass i plötzli a dich dank  
was machsch du jetzt grad, wie gaht's der so & wo bisch du dehei  
diä ganz zyt hemmers guet gha, s'isch mer vorcho, wienes gschänk  
säg, hesch du no e brief vo mer oder ä foti vo üs zwei  
hesch du nid zu mer gseid, bevor du gangä bisch  
dass äs au ohni mich wiitergieng & dass es besser für üs isch

doch ich hätt dir vill z'verzelle, s'isch sit denn so mängs passiert  
säg, isch alles eso cho, äs hätt mi mängisch interessiert

**wenn sich üsi wäg numm chrüzed, wenn miär üs nümmä gsehnd  
wenn mer üs nümm eifach träffed, will mer üs verloorä hend  
au wenn mer üs nid gönd go sueche, gfindsch mi trotzdem irgendwann  
vielleicht dänksch du mängisch au grad denn – wien ich a dich**

d'zyt lauft immer schneller, s'isch nüd me so, wie's mal gsi isch  
d'wält hed sich verändert, will miär üs fascht vergässe hend  
s'cha doch nid si, dass du uf einmal andersch worde bisch  
säg hesch's au scho ghört, dass miär nid gwusst hend, was mer wend

au wenn's scho lang verbii isch & jetzt ändlich alles schtimmt  
da git's en speicherplatz, i miär drinn, wo mer niemmer nimmt

**wenn sich üsi wäg nümm chrüzed, wenn miär üs nümmä gsehnd  
wenn mer üs nümm eifach träffed, will mer üs verloorä hend  
au wenn mer üs nid gönd go sueche, gfindsch mi trotzdem irgendwann  
vielleicht dänksch du mängisch au grad denn – wien ich a dich**

# EINE VO DENE

musik: berni weber / bernhard  
text: padi bernhard  
© 2010 all rights reserved

er hed immer gärn echli agäh,  
vo all dem züüg wo är so hed  
vo dem, was är no alles wird mache  
& was är scho agschtellt hed  
är cha sich alles chaufe  
mit gäld, won ihm nid ghört  
är hed ä huufä deals am laufe –  
weisch, sis business lauft wie gschtört

**är isch eine vo dene, wo alles hed  
eine vo dene, wo alles weiss, eine vo dene, wo jede kännt  
är nimmt sich, was är will, eine vo dene weiss äs genau:  
alles hed si priis & was andri hend, das will i au**

är tueds jedem gärn verzällä,  
was är als chind no nid hed gha  
me muess halt einfach wellä,  
so wird mä schnell zum gmachte maa  
är schpilt mir falsche charte,  
verlürt nid so gärn es schpil  
muess nid uf d'fraue warte –  
have fun! heisst sis ziel

**är isch eine vo dene, wo alles hed  
eine vo dene, wo alles weiss, eine vo dene, wo jede kännt  
är nimmt sich, was är will, eine vo dene weiss es genau:  
alles hed si priis & was andri chönd, das chan i au**

# GNUEG WYT WÄG

musik: bernhard  
text: padi bernhard  
© 2010 all rights reserved

ich ha de bättel scho mängisch anegrüehrt, i ha tobed, i ha gfluecht  
ha mi gärn i versuechig gfuehrt & scho mängisch alls verfluecht

& wenn's im läbä öppis gratis git, denn sägi vil, wo gar nid schtimmt  
& wenn mä's merkt, gibis numä ungärn zue, will mer's süsch no öpper nimmt

& wenn mi plan nid sötti ufgah, denn dreih mi um & ich weiss genau...

**denn fani eifach vo vorä a, irgendwiä wird's scho gah  
egal, wie wyt i gah muess, eifach gnueg wyt wäg, gnueg wyt wäg  
gnueg wyt wäg vo dier**

ich will di nid betrügä, au wenn me seid, ich miechis glich  
vom ghörä sägä lernt me lüügä, s'gahd scho lang nümä um dich

ich schpil so gärn monopoli & schpringä allne wyt voruus  
doch irgendwie laufscho so wyt vorn wieder hinnä drii  
& nur wer gäld hed chaufft sich nones huus

wenn ich das schpili irgendwann verschtah, denn gangi wäg, la alles schtah...

**denn fani eifach vo vorä a, irgendwiä wird's scho gah  
egal, wie wyt i gah muess, eifach gnueg wyt wäg, gnueg wyt wäg  
gnueg wyt wäg vo dier**

& hani au kei schtich gha, ha di glich nie im schtich gla  
ich ha us diär en ängel gmacht, & ha di glich zum tüüfel gschickt

# SUMMER

musik: bernhard  
text: padi bernhard  
© 2010 all rights reserved

de winter isch vergässe, de früehlig isch verbii  
jede tag isch no chli länger als är geschter no isch gsi  
& ich schwitz i minä schueh – i dem büroschtuehl  
es juckt mi i de nase vo dem heu i de luft  
d'sunnecreme mit kokosnuss wird zu mim summerduft  
us em radio singt e frau - vo «life, oh life»

**chumm, miär gönd a schtrand – sunnä, wasser & sand**  
**chumm, äs isch sowit – s'isch summer, summerferiä**  
**summer, summerferiäzyt**

alli mädels zeiged bei & decolltée & no chli meh  
i dä badi ligged d'lüüt irgendwo am ne see  
& ich tauch is wasser i – s'cha nümm vill besser si  
& alli sind irgendwie mit öppis schönem underwäx  
& alli schöne hend e schöni & hends schön mitenand  
& mis radio singt: «säg mer eifach nume no wieviu  
säg wieviu, wieviu gisch mer wenn i chume?»

ich liggä da, ha grad nume mini badehose a  
& dänkä a all das schönä züügs, woni scho mit dier ha gha  
& mer ligged so chli da & i lueg di so chli a  
& la d'zyt eifach schtah  
& d'sunne brännt & nid nur mini huut wird langsam heiss  
& s'vanilleglace lauft mer über d'hand, wo du zu mer seisch:  
summer, summerferiä, summer – summerferiäzyt

# HA GMEINT

musik: padi bernhard / bernhard  
text: padi bernhard  
© 2010 all rights reserved

ha gmeint ich müessi schtärbä & mis hätz hed ufghört schlah  
wär ohni öppis z'sägä, ganz plötzli nümme da

& mi hätt mi denn begrabe, imne wunderschöne grab  
mit bluemechränz im rägä, wo mi name druffä schtahd

**niemer weiss es, wenn's zyt isch zum gah  
niemer weiss es, wenn s'letschtä schtündli schlahd  
wenn de morgä nümme chunnt & de zeiger nümme dreiht  
wenn mä alles muess verlah – bini froh, dass i dich troffä ha**

ich wär gärn no einisch gsässe, det am see bi mier dehei  
hätt d'wält um mich vergässe, ganz wyt wäg mit dier elei

ich hätt gärn nomal glached, & z'vill gha vom rote wy  
wär iitaucht det i das meer, won ich als chind schon drin bi gsi

**niemer weiss es, wenn's zyt isch zum gah  
niemer weiss es, wenn s'letschtä schtündli schlahd  
wenn de morgä nümme chunnt & de zeiger nümme dreiht  
wenn mä alles muess verlah – bini froh, dass i dich troffä ha**

ich wärt furt bis früeh am morge, du hättsch barfuess tanzt mit miär  
hätt di agluegt & ich hätt der gschwore, ich gang nümme wäg vo diär

ha gmeint ich müessi schtärbä, & sig alles scho verbii  
zum glück bin ich verwachet, & s'isch no nid sowyt gsi

# ICH MAG DI NÜMME XEH

musik: bernhard  
text: padi bernhard  
© 2010 all rights reserved

wenn du dänksch, es sig jetzt besser & du hoffsch, du sigisch «in»  
wenn du glaubsch, es heig sich gändret & es ligg jetzt no me drin  
du bisch immer no nid wiiter cho, nur will du furt gsi bisch  
nei, du chunnsch nümmä vil wiiter, will du nur dis beschtä gisch

üsi wält wär so vil schöner, wärsch du nid mit üs hiä  
& ich glaub, es giengt mer besser, wenn ich dich nümm würdi gseh  
ich ha dich no niä gärn gha, doch du chasch gar nüd defür  
& wenn du bi miär lüütisch, stahsch eleigä vor dr tür

**hau ab – chumm schliich di furt, ich mag di nümme ha**  
**hau ab – wo du anetrampsch det wachst nü meh**  
**hau ab – besser wär's du würsch jetzt eifach ga**  
**hau ab – gang wäg – ich mag di nümmä xeh**

hei, ich gib dr jetzt en tipp & de choschtet dich gar nüd  
fründä lad me nid im schtich, doch ich weiss, das seid dr nüd  
ich wünsch dr schöni zyte, schick mer bitte nie e charte  
denn wenn du ändlich furt bisch, wird e keine uf dich warte

**hau ab – chumm schliich di furt, ich mag di nümme ha**  
**hau ab – wo du anetrampsch det wachst nü meh**  
**hau ab – besser wär's du würsch jetzt eifach ga**  
**hau ab – gang wäg – ich mag di nümmä xeh**

# ÜBERMORN

musik: sascha kammermann / bernhard  
text: padi bernhard  
© 2010 all rights reserved

mängisch wüssti scho ganz gärn,  
was s'beschte für mich wär  
äs isch fasch so, als miechti ich mis s'läbe schwär

ich vergässe hie & da, was ich für laschter ha  
äs isch fasch so, als hätti die scho immer gha  
doch eis weiss i ganz genau...

**morn fangi villicht a, morn bini denn sowyt  
übermorn wird alles andersch  
morn wachi nämli uf, morn isch äs ändlich zyt  
übermorn wird's nümm so si, wie's isch gsi**

s'gid sovil z'vill uf dere wält  
dass niemmer gmerkt, was wükklich fählt  
& jede weiss, alles dreiht sich nur um's gäld

& vor jedem nüüä jahr, sind alli vorsätz sunneklar  
& jede weiss, die wärded sowieso nid wahr  
doch eis weiss i ganz genau...

**morn fangi villicht a, morn bini denn sowyt  
übermorn wird alles andersch  
morn wachi nämli uf, morn isch äs ändlich zyt  
übermorn wird's nümm so si, wie's isch gsi**

& weiss jetzt au no nid,  
was miär de tag no vorem abig bringt  
weiss i eis ganz genau...

# S'CHA NID SI

musik: berni weber & markus kessler / bernhard  
text: padi bernhard  
© 2010 all rights reserved

du muesch mi nid go rette  
äs isch scho längschtens alles gseid  
muesch für mich kei gäld verwette  
& zum gäh bini nümm bereit

s'isch alles so lang guet gsi  
solang du alls vo mier hesch gha  
doch sit du gnueg vo mier hesch  
lahsch du mich eifach hie im räge schtah

**s'cha nid si, dass du vergässe hesch  
was mier zwe abgmacht hend  
s'cha nid si, dass du nümm weisch  
was du versproche hesch  
s'cha nid si, dass dier das gliich isch  
was mier üs gschwore hend  
s'cha nid si – nei, das glaub ich nid**

so mängisch simmer gfloge  
ab & zue uf d'schnorre gheit  
doch ich ha dich nie betroge  
& nid erscht sit du näb mer liisch

ich mag nümm länger warte  
bis du dier ändlich sicher bisch  
setz nid alles uf ei charte  
mier schpiled solange bis es fertig isch

# WETT NO MEH

musik: padi bernhard / bernhard  
text: padi bernhard  
© 2010 all rights reserved

meitli, wenn du wüsstisch wie du mer de chopf vertreisch  
& s'wird mer plötzlich andersch wenn du «hallo» zu mer seisch

dis lache rettet miär de tag & dini auge ziehnd mi a  
s'git niemmer, wo so wie du isch – wett so gärn me vo dem ha

**ich wett no meh – ich wett no meh**  
**ich wett no meh vo der gseh**

ich bi gärn i diner nöchi & lueg di schtändig a  
& hoff, dass es nid gmerksch wie sehr i uf di schtah

& wenn du mal nid da bisch, denn dänk ich immer nur a dich  
frag mi nid, werum's äso isch, das isch der würllich gliich

**ich wett no meh – ich wett no meh**  
**ich wett no meh vo der gseh**  
**ich wett no meh – ich wett no meh**  
**wett no vil meh vo der gseh**

weisch, all die schöne sache, wo mer zäme chönntet ha  
& mier würded alles mache, wär bloss di fründ nid da